

TE HAHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 7.

Tiurai 1929.

Mat. 23.

*E faaho'i mai to Atua ra o Iehova i to oe ra tîrîraa i
reira, e aroha mai oia ia oe, a haaputu mai ai ia oe mai te
mau fenua atoa mai, ta to Atua ta Iehova i haapurara'tu ia
oe ra. (Deuteronomi 30:3)*

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo"
tei papaihia e Tamate Aposetolo; Faaauhia ei reo Tahiti e Elita.

*HIRO'A FAAROO 10. Te faaroo nei matou i te haapu-
tuputu-hua ra o Iseraela, e i te faahoiraa mai o na opu ti-
no ahuru i moe ra.*

TE HAAPURARARAA O ISERAELA

Parau Haamaramarama: Na mua i to tatou haapiiraa i te
parau no te haaputuputuraa o Iseraela e mea tia ia ia haapii rii
tatou no te haapurararaa o taua feia ra.

UIRAA 1. Eaha te auraa no te parau *Iseraela*?

P. *Te Tamaiti Arii* ia to'na auraa, no te mea e mana
to te Tamaiti Arii i te Atua i te taata atoa hoi. I te mata-
mua ua parauhia Iakoba ia Iseraela e na muri iti aê ua faa-

topahia taua i'oa ra i nia i to'na mau huaai atoa, e ua paruahia ratou i te tamarī a Iseraela.

Parau Tauturu: Ua pee te i'oa ra o Iseraela i nia i na ati hoé ahuru ma piti i te tau no to ratou faatītiraahia e tae noa'tu i to ratou oraraa i roto i te fenua i parauhia ra, i raro aé i te mau haava e tae noa'tu ia Davida raua Solomana.

I te poheraa o Solomana ua faataahia na ati hoé ahuru ma piti ra i roto i na pae e piti. Ua pee te ati no Iuda e te tahi pae no te ati no Beniamina i te arii ra o Reoboama, e ua topahia te i'oa ra o to Iuda i nia iho ia ratou. Ua pee râ te toea o te mau ati ia Iereboama e ua tapea ratou i te i'oa o Iseraela. Ua vai raua mai te reira e tae noa'tu i te taime i faatītīhia'i e to Asura. Te vai noa ra to Iuda e tae noa'tu i to ratou faatītiraahia e Nebukanesa; e na muri aé i te tau no Kuro ua faatiahia ia ratou ia faatia i te hielō, e mai reira mai â ua tapea ratou i te i'oa o Iseraela no ratou iho, noa'tu e, aita ratou i tae i te piti ati no te ahuru ma piti ra.

Uiraa 2. Ua tohu maira anei te mau peropheta tahito i roto i te Bibilia, no te haapurararaa o to Iseraela?

P. Oia mau, e rave rahi te mau parau tohu i faaitēhia i roto i te Bibilia no te reira ati rahi.

Parau Tauturu: I te oraraa o to Iseraela i te medebara e i te fenua i parauhia atoa hoi, ua fafau maira te Atua i te mau faufaa e rave rahi ia ratou mai te mea e haapao mai-tai ratou; area râ ua tuu atoa mai oia i te mau utua no to ratou haapao-ore-raa e tae noa'tu i to ratou haapurararaahia.

Te na ô maira Mose i te mau mahana hopea no to'na oraraa e, "E e pohe oe i mua i te mau enemi ia Iehova;" (Deut. 28:25) "E hopoi Iehova ia oe, e to arii atoa ta oe e faaari i nia iho ia oe ra, i te fenua aore i itea e oe e to mau metua atoa ra;" (Deut. 28:36) "E haapurara Iehova ia oe i ō te mau etene atoa ra, mai te tahi hopea mai o te mau fenua ra e tae noa'tu i te tahi hopea o te fenua ra; e ei reira e haamori ai i te mau atua ēē i te raau e te ofai,

o te ore i itehia e oe e to mau metua ra.” (Deut. 28:64)

Na roto i te tuatapaparaa o to Iseraela ua ite tatou e, aita ratou i haapao i te mau parau a Iehova, e no reira ua tia roa ia ratou ia farii mai i taua mau utua nei. Ua faaite maira te peropheta ra o Ahia e, “E tairi hoi Iehova ia Iseraela mai te aeho e ueuehia i raro i te pape ra, e vaere hoi oia ia Isaraela i teie nei fenua maitai i ho-mai-hia mai e ana i to ratou ra metua, e puehu hoi ratou ia’na e ia mairi mai te pape nei, no te mea, ua hamani ratou i te ururaa haamori idolo, i te faaririraa’tu ia Iehova.” (I Te Mau Arii 14:15)

Ua faaaau maira Isaia i to Iseraela i te hoé o vine o tei faatupu i te ino moa’tu to’na haapaoraahia, e no reira ua pau ia i te taataahihia. A hió i te Isaia 5:1-7.

Ua amui atoa Ieremia i ta’na parau tohu i te na ôraa mai e, “E faataa ê atu vau ia outou i mua i tau aro nei; mai ta’u i faataa ê i to outou mau taeae ra, te mau huaai atoa o Epheraima.” (Ieremia 7:15) Ua na reira hoi maira Amosa i te na ôraa mai e, “Inaha hoi, na’u e faaue, e na’u e ueue i te utuafare o Iseraela i nia i te mau fenua atoa ra, mai te taata e ueue i te titona i roto i te ueueraa ra.” (Amosa 9:9)

Uiraa 3. Teiheia te tahi mau parau tohu no te haapurararaa o to Iseraela?

P. Ua riro te Buka a Moromona ei piti no te ite e, e haapurarahia to Iseraela, e te vai ra te tahi mau tohu no te reira i roto i taua buka ra.

Parau Tauturu: Ua faaite maira Lehi, te peropheta matamua no te Ati Nephi e, E riro to Iuda i te faaroo ore e e haapurarahia ratou i nia iho i te ao nei. I Nephi 10:11-12. Ua ite atoa Nephi i to Iuda i te haapurararaahia, e to’na mau taeae, te Ati Lamana atoa hoi. I Nephi 13:11-14. Ua faaite maira Nephi i te tahi parau na te peropheta ra o Zenosai i te na ôraa mai e, “E no te mea na faafariu ê atu i to ratou aau, te na reira maira te peropheta, e ua inoinohia ratou i

tei moá i Iseraela nei, e ori haere noa ratou i te tino nei, e e pau, e riro hoi ratou ei tuhiraa e ei tâhitoraa, e e inoinohia hoi ratou e te mau nunaa atoa.” (I Nephi 19:14) E ua na ô faahou maira Nephi e, “E inaha, ua moé roa te mau taata e rave rahi i to Ierusalema ra i teie nei. Oia ia, i aratai-ê-hia te tahi pae rahi o te mau opu atoa, e ua purara noa ratou i te mau fenua moana.” (I Nephi 22:4)

E ua riro atoa Nephi e to’na mau huaai atoa i faaite-papuraa i te tahi pae no te haapurararaa; no te mea no roto mai ratou i Ierusalema, e na muri mai i te Mesia ua haapurara-ê-hia te toea no te ati Lamana e ati noa aé i te fenua Amerika, e o ratou ia te mau Inidia i iteahia i reira.

Uiraa 4. Ua tupu anei taua mau tohuraa nei?

P. Na te mau parau moá e te mau parau tuatapapa atoa e faaite mai i te tupuraa i taua mau parau nei no to Iseraela haapurararaahia.

Parau Tauturu: Mai ta tatou i haapii i te uiraa hoé, ua faa-taa-ê-hia Iseraela i roto i na pae e piti e ua topa atura raua atoa. Ua afai-titi hia to Iseraela i roto i te mau oire no to Medai. (II Aarii 17:56)

Ua riro te reira ati i to Iseraela ei faaitoitōraa i to Iuda, e ua haapao maitai ihora ratou no te tahi na matahiti i raro aé i te aarii ra o Zedekia. A aarii ai Zedekia, no to ratou haapao ore ua haavi Nebukaneza i te oire Ierusalema, faatitihia ihora to Iuda e to Babulonia. I reira ia te hopea no to ratou mana e ua haapurarahia tura ratou i rotopu i to Babulonia. I te tau no Kuro ua arohahia ratou na roto i to ratou faatia-raahia ia faatia mai i te hielō. Aita aêra i maoro na haavi-hia ratou e Aiphiti e Asura e tae noa’tu hoi ia Roma.

I muri aé i to Iesu poheraa ua faatupuhia te orurehau e na to Roma ratou i afaititi-hia i te tahi vahi e te tahi vahi, e ua haamou-roa-hia te oire ra i Ierusalema e te hielō atoa hoi.

Mai reira mai â ua ori haere noa to Iuda i te mau vahi

atoa o te ao nei, e ua ueue-mau-hia ratou i rotopu i te mau nunaa atoa; area râ mai te hopea no te parau na Amose "E ore roa râ te hoé huero e mairi i raro i te repo". (Amose 9:9)

Uiraa 5. Ua riro na ati hoé ahuru no Iseraela ei aha?

P. Ua riro ratou ei na ati hoé ahuru i moe ra.

Parau Tauturu: I te taime i afaititi-hia i to Iseraela i Asura, ua moé roa to ratou tuatapaparaa, maori râ te tahi mau vahi iti tei toe mai nei. Ua hinaaro ratou i te tiamâ e no reira ua haere atura ratou atoa i te pae i apatoerau. Hió i te Ieremia 3:12. Ua na ô faahou maira oia e, "Arearâ, te ore ra Iehova, o tei aratai mai i te tamarii a Iseraela mai te fenua i te pae i apatoerau ra, mai te mau fenua mai i tiahi-hia 'tu ai ratou e ana;" (Ieremia 16:15) E ua na reira atoa te tahi parau tohu i teie nei mau mahana hopea ra. Buka Fafau 133:26-27.

Ua papai maira Ezara i te tahi parau mai te faaite mai e, ua haere ratou e hoé matahiti e te afa i te pae i apatoerau. Aita râ teie nei mau parau i amuihia i roto i te Bibilia, maori râ i te apocaruphe.

I te taime Iesu i tae mai ai i nia iho i te fenua Amerika i rotopu i te Ati Nephi ua na ô mairâ oia e, "Amene, amene, e parau atu vau ia outou, e mamoe ê atu â ta'u, e ere i to teie nei fenua, e ere atoa i to Ierusalem; e ere atoa i to to reira ihora, to te mau vahi i haerehia e au ra."

Ua na ô maira Iakoba Tamate, te hoé aposetolo no te Ekalesia a Iesu Mesia e, "E tae mai te mau ati; aita ratou i moé i te Atua; e haere mai ratou mai tei faaitehia; e te parau atu nei au ia outou e, te ora nei---oia, tei i ô nei te tahi--o te ora e tae noa 'tu i to ratou taiōraa i te mau parau tuatapaparaa no na ati hoé ahuru i moé ra." Ua faaitehia teie nei parau i roto i te hoé amuiraa rahi no te Ekalesia i Roto Miti Utaha i te matahiti 1916.

Petero E Ta'na Mau Taeae.

Ua faaite papu te Fatu ia Petero e ta'na mau taeae, o te mau Apotetoro ra, i te huru o ta'na Ekalesia, o te patuhia i nia i te ofai Heheuraa, oia hoi, te paraparauraa a Te Atua i te taata nei. I ta'na mau haapiiraa no te faaafaroraa i te mau hape i ravehia e te mau melo, ua faaau te Fatu i ta'na Ekalesia mai te hoé tino taata ia tia ia faaroo e ia haava atu mai te tiaturi i te Varua o te Atua.

Ua ite papu roa te mau Aposetolo i ta ratou ohipa i muri ai i to Iesu revaraa i nia i te rai, oia hoi, te matamua ia; Ua riro ratou ei mau ite no te Mesia, e Tamaiti oia na te Atua, e te faaora oia no teie nei ao, e ia poro haere i taua ite ra i te mau fenua atoa e tia'i. Te piti ia; E haapao ratou i te Ekalesia, e ia faaitoito ratou i te raveraa i te mau ohipa e au i rotopu i te taata nei, mai tei faaitehia mai ia ratou e te Fatu.

Te parau hopea Ta'na i faaite mai ia ratou, ia faaea ratou i Ierusalema no te tiairaa i te Varua Maitai ta'na e tono mai ia ratou, mai te metua ra, ia riro oia e maramarama, e ei ite no ratou.

E mai Oliveta, te mouá no te maueraa o Iesu, ua hoi ratou e te tino ahuru ma hoé i Ierusalema, e ua îroa ratou i te oaoa e i te Varua o te Atua. E ua tae ratou i roto i te Hiero, e i roto i te piha i faataahia no ratou. Ua pure â ratou e ua himene atoa hoi. E ua tae mai te mau pipi o tei faataaehia e te tau peapea. E ua tahoé i to ratou mau aau no te mea, ua ite mata ratou ia Iesu ei To'na tiafaahouraa, eito'na maueraa'tu i nia i te rai. Ua ite atoa ratou e, i muri ae i te tiafaahouraa o Iesu, ua tiafaahou atoa te mau taata e rave rahi o tei taoto i roto i te menema mai te matamua mai â.

Faaauhia ei re'o Tahiti e Gihoti Borobiti.

(Tuatibia teie nei parau.)

Aita i Nehenehe i Te Taata i Te Ora la'na Iho

Mai te mea e, e patoi te mau melo o te tino i te parau o to ratou fatu, e e na o mai te rima e, eita vau e rave i te ohipa i te faaamu i te vaha, e na o mai te vaha e, eita vau e amu i te maa no te tino, e e parau atu te avae e, eita maua e haere, ua fiu maua i te hopoi atu i te tino, e na reira noa i te mau melo atoa ra. Eita e maoro e poia roa te opu; eita e maoro e paruparu te avae, e te rima, e e na reirahia te mau melo atoa. E i reira ua ite te tino e, ia ore te mau melo ia faaitoito, e mea papu ia e pohe te tino. Ia fatata roa te avae i te pohe, i reira e tupu to raua hinaaro ia ora'i, i reira ta raua haereraa i te hopoi atu i te tino i te vahi e vai ai te maa. E faaamu te rima i te vaha, e e amu te vaha i te maa. Eita e maoro, e farii na avae i to raua puai e te rima i to raua ora e e ora te tino pau roa. Ua roaa ia ratou i te hoé haapiiraa, oia hoi; aita i nehenehe i te hoé ia rave i te ohipa na'na iho, ia tahoé ratou i ta ratou ohipa e tia'i ia ora'i te tino ra, e ia tauturu ratou i te tahi e i te tahi e tia'i, e aore ra e pohe te tino nei.

Hoé â te huru o te taata nei, aita i nehenehe i te hoé ia rave i te ohipa na'na iho, e ia manuia'i oia i te ao nei. A feruri tatou i te hoé mau taata o te rave i te ohipa no te faa-tiaraa i te hoé eáturu; e mai te mea e, eita ratou e tahoé i to ratou mau manaó e i ta ratou mau ohipa, eita roa ratou e faaoti i taua ohipa ra. E na ô mai te hoé rave ohipa e, eita vau e afai i te ofai no te paturaa i te niu, e na ô mai te tahi, eita vau e hopoi i te sima no te paturaa i te niu, e na reira noa te mau rave ohipa'toa. Eita roa'tu te ohipa e faa-otihia, maori ra, ia tauturu ratou te tahi i te tahi.

Hoé â te huru o te hau i nia iho i te fenua. Mai te mea ua faatau te mutoi, ia tae mai te taata eia e haamata'i i ta'na ohipa eia, e ia ore atoa te haava e rave i ta'na ra ohipa,

eita iho â te taata ino e haavahia'i no ta'na ohipa. Ia na reira te mau faatere hau i te faatau, e i te haapao ore i ta ratou ohipa mai te patoi te tahi i te tahi, eita e maoro e haamata te mau taata i te fenua i te tama'i te tahi i te tahi, e tae noa'tu i te taime e pau ai ratou.

I roto i te evanelia, te vai nei te opuaraa o te Atua no te faaoraraa i te taata nei. Aita i nehenehe i te hoé ia haapao i teie opuaraa na roto i ta'na iho ohipa, ia roaa ra ia'na te tauturu e tia'i.

Na roto i te ohipa ta Iesu i rave, ua ite papu tatou e, ia bapetizohia te taata e tia'i. Aita i nehenehe i te taata ia bapetizo ia'na iho, e no reira, ia bapetizohia'i oia e te tahi taata mana e tia'i.

Na roto atoa i ta Iesu mau haapiiraa, ua roaa ia tatou te manaó e, ia tauturu atoa tatou ia vetahi ê ra, e tia'i. Ua tae mai Iesu i te ao nei, e ua horoa oia i to'na iho toto no te faaoraraa i to te ao, ia roaa i te taata te ravea no te ora mure ore.

Papaihia e Edua

O Vai Tei Faatiamahia e te Toto o te Mesia?

EAHA te auraa mau a te parau ta Iesu i parau atu ia Nikodemo, a na ô atu ai oia ra e, "Amene, amene, e parau atu vau ia oe, Ia ore te taata ia fanau i te pape e te Varua, e ore oia e ô i te basileia o te Atua ra?" (Ioane 3:5)

Aita Iesu i parau atu ia Nikodemo, ia bapetizohia te mau taata anae o te haere mai i roto i teie nei ao i muriho i to'na haereraa mai. Ua parau atu ra oia e, eita te taata e ô i roto i te Basileia a te Atua ia ore oia ia bapetizohia i te pape e i te Varua.

No te papuraa o teie parau i nia nei, eita e tia ia tatou ia tiaturi i te haapiiraa tei na ô mai ai e, ua mono noa te baptizoraa i te peritomeraa tei haapaohia e te mau tamarii o Iseraela i te tau no Mose.

Te faaite mai nei te Buka Poe Tauá Rahi, (Mose 6:59-66) i te hoé haapiiraa huru api i te mau taata o te ao nei. Ua faaiteite te Atua ia Adamu i te parau no te baptizoraa, i te na ôraa atu e, "Ia fanau oe i te pape e i te Varua i roto i te Basileia a te Atua, e ia tamahia oe e te toto a te Tamaiti Fanautahi a te Atua.

Te faaroo nei te Ekalesia a Iesu Mesia i te Feia Moa i te Mau Mahan Hopea Nei e, ua oti Adamu e te mau peropheta i te baptizohia i te pape e i te Varua. Ahiri aita, aita iho â ratou i tae i roto i te Basileia. Ua papaihia i roto i te Ephesia pene 4 e te irava 5 "Hoé hoi Fatu, hoé faaroo, hoé baptizo," e no reira, e ere te peritomeraa i te baptizoraa, e faaueraa ê ia. Aita'toa te taata i ô i roto i te Basileia na roto i te peritomeraa anae, maori ra' ia baptizo-atoa hia.

Ua faaauhia te pape i te ao nei, te Varua i te ao varua, e ua riro te toto taraehara o te Mesia, e mana tei taati i te ao nei i te ao varua, no reira, te vai nei na tufaa tumu e toru no te baptizoraa, oia hoi, te pape, te Varua, e te toto taraehara o te Mesia.

Te na ô maira te Mesia, "O vau te eá, e te parau mau, e te ora, aore roa e taata e tae i te Metua ra, maori ra ei ia'u." E no reira, ua riro oia e arai mau, e eita te ao nei, e te ao ra, e tahoéhia maori ra, na roto i to'na toto taraehara. Ia hinaaro tatou ia faaorahia e te toto o Iesu, e rave iho â tatou i te tapao i titauhia e ana.

Papaihia e Adamu

Te Mau Parau Apî

Na matahiti i mairi ae nei, ua vai ra i San Francisco te hoé saiete ravai. Ua vai ra i roto i te rima no teie saiete ei piti ahuru ma hoé pahi taie, e mau pahi rahi roa teie mau pahi, mai te 1300 tani e tae noa'tu i te 3300 tani. I te mau matahiti atoa ia haamata te tau mahanahana, ua faarue teie mau pahi i San Francisco, e ua tere atu ratou i te moana rahi, i parauhia te moana Pacific, oia hoi, i te pae tooa o te ra no te fenua Alaska. E i reira, ua taupeá ratou i te samanu, ua rave noa ratou i teie ohipa e tae noa'tu i te tai-me i haamata'i te tau toetoe, i reira ratou i hoi atu ai i San Francisco. I teie nei ra, ua mono te tahi mau pahi auahi i taua mau pahi taie ra, maori ra, e piti, o Te Fetia no Alaska ia te i'oa no te hoé e o Te Fetia no Holland ia te i'oa no te tahi, area ra, teie iho â matahiti ia te tere hopea no teie na pahi, e reira raua e monohia'i e te tahi pahi auahi. E pae noa iho pahi auahi i mono i na pahi taie e piti ahuru ma hoè, e ua nehenehe i taua na pahi auahi nei ia rave i te taatoaraa o te ohipa ta te mau pahi taie i rave ae nei. Ua oto te tahi mau taata o tei mâtau i te teretereraa i nia i te mau pahi taie, no te mea, ua parau ratou e, ua ore te tau no te pahi nehenehe, te pahi hau roa'tu i te nehenehe i te mau pahi atoa, o te pahi taie ia. E ua nehenehe atoa ia tatou ia parau, oia mau, ua ore te tau o te pahi taie e te rahi hoi, no te mea, o teie na pahi e piti nei o tei tere atu i teie matahiti, o te hopea raua o te mau pahi rahi o tei tere taie noa.

Ua moé te hoé tamaiti api o Melavina Reeves to'na i'oa, i roto i te hoé vero hiona. Te hauti ra oia i te pae o te faa-apu no to'na metua, e ua haamata te hiona i te topa, e ua tupu atoa te mataí. Aita'tura i neheuehe ia'na ia hoí i te fare, no te mea' ua moé roa te eá e te mau tapao fenua. Ua imi-noa-hia oia e te mau taata e rave rahi, tei roto hoi i te pupu o tei imi ia'na, e piti hanere Initia o tei mâtau i te reira fenua. Aita ra oia i itehia, e ua manaó te mau taata e, no te rahiraa o te hiona ua pohe oia i to'na imiraa i te fare, e ua tapoi-roa-hia to'na tino i te hiona. Ia tahe te hiona e imi-faahou-hia to'na tino, e ia itea, e tanuhia i roto i te menema.

Te opuahia nei te hoé tere roaroa na nia i te vaa, e te hoé taata o Charles Plannischuk e ta'na na tamarii tamaroa too piti. E haamata ratou i te pae apatoerao roa e tere mai na te pae o te fenua Amerika, e na roto hoi i te tahi mau roto rarahi e na roto i te anavai Mississippi. E hope taua tere nei i te oire ra, i Havana. E vau tauatini maire te roa no taua tere ra mai te haamataraa e tae noa'tu i te hopea.

Ua faaroo ê na tatou i te parau no te mau afata vairaa maa o tei hamanihia ma te hoé vahi no te pape paari, e ia tuuhia te pape paari i roto, e toetoe roa te reira afata i roto, e te maa i tuuhia i roto, e maitai noa ra te reira. E ua faaroo atoa paha tatou e, te vai nei te mau afata vairaa maa o tei hamanihia ma te hoé machine uira i roto, ia faatoetoe i te afata. I teie nei ra, te vai atura te tahi huru afata vairaa maa. I teie huru api, te vai nei te hoé machine i faaterehia i te hinu. Ua faaamuhia i te hinu e na te hinu e tamahanahana i te machine, e na roto i te tamahanahanaraa i te machine, e faatupu te reira machine i te toetoe i roto i te afata. E ohipa maere roa teie ia tatou, area ra, te ohipa a te mau taata ite, te haere nei i mua.

Te tamata noa ra te mau taata faahoro pereoo uira ia riro te rê ia ratou. I roto i te (Heheuraa Api) no te avae Tiunu, ua papaihia te hoé parau tei faaite mai i te huru no te pereoo api o tei riro ia'na te rê no te tere, a horo ai oia e 231 maile i te hora hoé. I muri iho i te reira faahororaa, ua tamata faahou-hia te pereoo tahito o tei pohe to, na taimé i te pereoo api. I te haamataraa o te faahororaa, ua tere maitai te pereoo, e ua manaó te mau taata mataitai e, e faahoihia te rê ia'na na roto i to'na itoitó. Ia tae ra to'na viti-viti i te 203 o te maile, ua hape rii te faatererara, e ua tahuri te pereoo, parari roa'tura. Ua pohe roa te taata faahoro, (o Bibili to'na i'oa.) Ua pohe atoa te tahi taata nenei hohoa o tei tia i te pae purumu i te vahi i tahuri ai te pereoo, mai te nenei i te hohoa no te faahororaa.

E hoé ahuru ma van taata i pohe i nia i te hoé pahi hoo taoá i te mau fenua Philipino. Te horoi ra te mau mataro i te pahi i te tahi puá o tei hamanihia na roto i te mori arahu, e no te matai ore, e no te veavea o te machine, i roto i te pahi, ua tupu te auahi. E rave rahi te mataro i paapaa i roto i taua pahi ra, na mua i to ratou taeraa i rapai au. Ua ino hoi te parau radio, e aita atura i nehenehe i te toea o te mau taata ia ani i te tauturu. No reira, ua ouá noa ratou i roto i te poti hoehoe e tamataraa ia faaorahia. No te rahiraa o te auahi i nia i te pahi, ua itehia e te mau taata i nia i te hoé pahi auahi tei tere i te fenua ra, i Manila. Haapeepee iho-ra ratou i te vahi i itehia'i te auahi, e faaora atura i te mau taata tei painu noa i nia i te poti hoehoe. E hoé ahuru ma hoé ratou tei ora mai na roto i taua ati ra.

Geo. W. Burbidge Imprimeur,
Rue Brea et de la rue Dumont d'Urville, Orovini, Papeete